

الجواب الثاني / نبيه

٢٥ جمادى الآخر من عام ١٤٠٢هـ

الأثنين الموافق ١٩ إبريل لعام ١٩٨٢ م

إلى حبيبي مسعد

العامل في بلاد الثلج

في بلاد الواه

إلى الشاب الحليوه

حافظ هواه

إبن جارنا

اللي كان بيني وبينه من مسافه

شباكين وحدف طوبه

ويدوب نظرة لقاه

أسمراني اللون

أخضراني القلب

يحرسه المولى لصباه

ثم أما بعد،،،

طب يا سيدي

حمدلله على سلامة وصولك

جانني جوابك

وشوفت قولك

بس آه يا مسعد

لو بأيدي ؛ ولو أطولك

إيه بقى موضوع

اللوابس والقوالع

شيل يا مسعد من دماغك

الخلاعه والخوالع

أنتبه للشغل بس

وأحترمني في الغياب

أنا ليك وأنت ليا

وأنت غير كل الشباب
وإياك تبص لحد
أو تلمح بعينك طرف واحده
خد كلامي بجد يا مسعد
مش عايزه مناهده
بكفياني الشوق
والليل الطويل
والقلق في البُعد عنك
والوقت الثقيل
من بلاد الأنتظار
بشوق ولهفه
كنت فاهمه وكنت حاسه
وكنت عارفه
إن نار البُعد تكوي مرتين
وإن في غيابك

هتبقى النار نارين

وسلام ختام

وأبقى طمني عليك ونام كويس

